

Mohd Amirul Kasyful Nur bin Zulkifli

From: Unit Komunikasi Korporat
Sent: 23 Mac 2017 10:18
To: UUM - All Staff; UUM - All Students; Staf - Pesara UUM
Subject: Menoreh Getah, Masak Kari, Kejar Ayam, Tangkap Ikan – Pelajar Jepun Kagum Keunikan Budaya Melayu



Unit Komunikasi Korporat
CORPORATE COMMUNICATION UNIT
Universiti Utara Malaysia



23 MAC 2017 / 24 JAMADILAKHIR 1438H

=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Siti Fatimah Abdullah

Gambar oleh: Muhammad Hasif Ismail

MENOREH GETAH, MASAK KARI, KEJAR AYAM, TANGKAP IKAN – PELAJAR JEPUN KAGUM KEUNIKAN BUDAYA MELAYU



UUM ONLINE: Pertama kali merasai selut di bendang, menoreh getah, masak kari, menangkap ikan, kejar ayam dan kambing antara detik terindah buat pelajar Tokyo University of Foreign Studies ketika menyertai program anak angkat sekitar Kubang Pasu dan Kota Setar.

Program anjuran Ghazali Shafie Graduate School of Government (GSGSG) UUM dan Kerajaan Negeri Kedah membabitkan 12 pelajar yang mengambil kursus Bahasa Melayu yang diketuai oleh pensyarahnya, Faridah Mohamad.

Menurut Mayu Takaishi, 20, program ini bertujuan membuka minda pelajar untuk menghayati budaya dan Bahasa Melayu dengan lebih dekat yang meninggalkan 1001 kenangan manis.

“Saya memang berminat dengan Bahasa Melayu dan mempelajarinya sejak 6 bulan lalu akhirnya dapat mengaplikasikannya di sini bersama keluarga yang sangat baik menyantuni saya.

“Bila dengar kami bercakap dalam Bahasa Melayu, mereka bertambah seronok dan dilayan seperti anak sendiri sehingga kita lebih yakin untuk memperkenalkan diri dan bertanya apa sahaja yang ingin diketahui,” kongsinya.

Tambahnya, peserta berpeluang memahami budaya setempat menerusi program keluarga angkat yang membuatnya mengagumi keunikan dan cara hidup yang diamalkan oleh masyarakat Malaysia yang berbilang bangsa.

“Kami terharu dengan sambutan yang diberikan, malah penduduk membuat kenduri, meraikan kedatangan kami, walaupun baru sampai mereka bertegur sapa dengan ramah seolah-olah macam sudah lama kenal membuatkan kita tidak segan.

“Tinggal bersama mereka banyak cerita yang dibuahkan pada masa sama terdedah dengan budaya penduduk tempatan yang penuh adab sopan dan unik,” jelasnya yang ditemui ketika Lawatan Pelajar Dan Pensyarah Dari Tokyo Foreign Studies di Welcome Centre, semalam.

Ujarnya, UUM sebuah kampus yang kaya dengan alam semulajadi yang sangat cantik dengan pelbagai aktiviti boleh dilakukan seperti memanah, menunggang kuda dan go-kart yang kondusif untuk pembangunan pelajar.

Delegasi turut dibawa melawat sekitar UUM seperti tasik, pokok tiga beradik dan Varsity Mall.

Sementara itu, Nanami Tomita, 20, terpicat dengan suasana kekeluargaan dan kampung yang indah seperti rumah kayu, sawah padi yang terbentang luas dan sungai yang mendamaikan membuatnya benar-benar menghayati kehidupan desa.

“Pemandangan yang menakjubkan, Malaysia unik dan cantik malah orangnya sangat baik dan berbudi bahasa, pertama kali jumpa, mereka bersalaman dan memeluk saya seperti keluarga sendiri sekali gus menarik minat untuk mengenali masyarakat dan agama Islam dengan lebih dekat.

“Saya suka makan dan mencuba benda baharu goreng pisang, kari dan saya nak tahu banyak perkara misalnya kenapa ayah selalu ke masjid, apa itu waktu sembahyang, kenapa wanita perlu memakai tudung.

“Saya selesai pakai baju kurung, masa nak keluar rumah saya lihat kakak dan umi memakai tudung, rupa-rupanya inilah suruhan agama Islam lalu saya turut memakai tudung,” ujarnya yang digelar dengan nama melayu, Hani.

Momen indah sewaktu menghadiri kenduri kahwin, kunjung mengunjung, menziarahi saudara yang sakit di hospital, makan menggunakan tangan, diperkenalkan kepada sanak saudara dan rakan-rakan yang teruja mengambil gambar sentiasa melekat di ingatannya.

“Saya kagum dengan cara hidup kampung, orangnya mudah mesra, ambil berat, kental dengan semangat kejiranan sehingga menganggap jiran seperti saudara sendiri,

“Ini satu pengalaman yang paling mahal apabila dapat bergaul dengan mereka, saya perhatikan orang kampung buat apapun bersama-sama dalam suasana meriah dan berkasih sayang,” ujarnya yang suka memanah dan berenang.

Tambahnya, setahun masa yang diambil sebagai persediaan menyertai program ini termasuk bekerja sambilan di kedai makan untuk mendapatkan wang membiayai perbelanjaan semasa di Malaysia.

“Program seumpama ini perlu diteruskan pada masa akan datang dan berharap hubungan yang terjalin akan berpanjangan sudah pasti pengalaman ini akan dibawa pulang ke negara saya,” ulasnya.,” katanya.

Tidak lengkap pengembaraan jika tidak mengunjungi destinasi menarik di Kedah seperti Gunung Jerai, Muzium Padi dan Masjid Zahir.



Universiti Utara Malaysia Official Website <http://www.uum.edu.my>

Disclaimer: This e-mail (including any attachments) may contain confidential information. If you are not the intended recipient, you are hereby notified that any review, distribution, printing, copying or use of this e-mail is strictly prohibited. If you have received this e-mail in error, please notify the sender or Universiti Utara Malaysia (UUM) immediately and delete the original message. Opinions, conclusions and other information in this e-mail that do not relate to the official business of UUM and/or its group of companies shall be understood as neither given nor endorsed by UUM and UUM accepts no responsibility for the same. All liability arising from or in connection with computer viruses and/or corrupted e-mails is excluded to the fullest extent permitted by law.